



REPUBLIKA E SHQIPËRISË

## KËSHILLI I EMËRIMEVE NË DREJTËSI

### VENDIM

Nr.21, datë 03.12.2021

**PËR LEJIMIN E KANDIDIMIT TË ZOTIT SANDËR BECI NË VENDIN VAKANT PËR GJYQATAR NË GJYKATËN KUSHTETUESE, SHPALLUR NGA GJYKATA E LARTË NË DATAT 22.11.2018, 19.04.2019 DHE 03.06.2021**

Këshilli i Emërimeve në Drejtësi, i përbërë nga :

<b>Ervin Pupe</b>	- Kryetar
<b>Marsida Xhaferllari</b>	- Zëvendëskryetare
<b>Elsa Toska</b>	- Anëtare
<b>Adnan Xholi</b>	- Anëtar
<b>Astrit Kalaja</b>	- Anëtar
<b>Elona Toro</b>	- Anëtare
<b>Gjon Fusha</b>	- Anëtar
<b>Genti Xholi</b>	- Anëtar
<b>Rilinda Selimi</b>	- Anëtare/relatore

Asistuar nga sekretare **Ermelinda Kadiu**, me praninë e **Avokates së Popullit, zonjës Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), të përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve: **zotit Bledar Dervishaj**, përfaqësuesit i autorizuar i Presidentit të Republikës, dhe **zonjës Mimoza Arbi**, përfaqësuese e autorizuar e **Kryetarit të Kuvendit**, në mbledhjen e datës 03.12.2021, mori në shqyrtim çështjen që i përket:

**KANDIDATIT:** **Sandër Beci**

**OBJEKTI:** Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë në datën 22.11.2018, 19.04.2019 dhe 03.06.2021.

## KËSHILLI I EMËRIMEVE NË DREJTËSI

Pasi dëgjoi relatimin e anëtares së KED, zonjës Rilinda Selimi, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit dhe si bisedoi çështjen në tërësi,

## VËREN:

### I. Fakte në lidhje me procedurën e kryer nga KED.

1. Gjykata e Lartë, në datën 22.11.2018, ka shpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese për shkak të përfundimit të mandatit, si pasojë e shkarkimit nga detyra të gjyqtarit Fatmir Hoxha. Hapja e procedurës është shpallur në zbatim të nenit 125 të Kushtetutës dhe të pikës 1 të nenit 7/ç të Ligjit nr. 8577/2000 *“Për organizimin dhe funksionimin e Gjykatës Kushtetuese në Republikën e Shqipërisë”*, i ndryshuar (në vijim ligji nr. 8577/2000).

2. Në përfundim të afatit të kësaj procedure, Gjykata e Lartë i ka dërguar Këshillit të Emërimeve në Drejtësi (në vijim KED), listën e kandidatëve, të shoqëruar me dokumentet e paraqitura prej tyre për përmbushjen e kushteve dhe kriterëve të përcaktuara në nenin 7/a të ligjit nr. 8577/2000.

3. KED, me vendimin nr. 6, datë 05.04.2019, ndër të tjera, vendosi pezullimin e procedurës së verifikimit të kandidaturave për këtë vakancë të shpallur, si dhe njoftimin e Gjykatës së Lartë për të vlerësuar rishpalljen e thirrjes për paraqitjen e kandidaturave.

4. Në datën 03.06.2021, Gjykata e Lartë, me të njëjtën bazë ligjore, ka rishpallur hapjen e procedurës së aplikimeve për plotësimin e këtij vendi vakant. Pas përfundimit të afatit, Gjykata e Lartë i ka dërguar KED-së, një listë të dytë të kandidatëve, që i ishin përgjigjur rithirrjes së saj, të shoqëruara me dokumentet e paraqitura prej kandidatëve për përmbushjen e kushteve dhe kriterëve ligjore. Ndërmjet kandidatëve që ka shprehur interesin pas rishpalljes së procedurës për plotësimin e këtij vendi vakant të krijuar në Gjykatën Kushtetuese është edhe z. Sandër Beci.

5. Në vijim, KED-ja në mbledhjen e datës 12.07.2021 vendosi shfuqizimin e vendimit të saj nr. 6, datë 05.04.2019 *“Për pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Gjykatën e Lartë për të vlerësuar rishpalljen e thirrjes për paraqitjen e kandidaturave”*, si dhe rifillimin e procedurës së verifikimit të kandidaturave për anëtarë të Gjykatës Kushtetuese, duke përfshirë në një listë të përbashkët, të gjithë kandidatët që i ishin përgjigjur të gjitha shpalljeve.

6. Në të njëjtën mbledhje të datës 12.07.2021, KED realizoi edhe procedurën e shortit manual për përzgjedhjen e anëtarit relator dhe të këshilltarit ligjor për këtë vakancë, në zbatim të nenit 228 të ligjit nr. 115/2016 *“Për organet e qeverisjes së sistemit të drejtësisë”*, i ndryshuar (në vijim ligji nr. 115/2016), pikës 4 të vendimit nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, i ndryshuar (në vijim vendimi nr. 4/2019 i KED) dhe pikave 5, 27 deri 37 dhe 41 të Vendimit të KED-së nr. 2, datë 15.02.2019 *“Për procedurën e shortit të caktimit të relatorëve për pozicionet vakante në çdo institucion”*, i ndryshuar. Me anë të kësaj procedure, relatore për këtë vakancë u përzgjedh anëtarja Rilinda Selimi, ndërsa këshilltar ligjor Laureta Nezaj.

7. Në datën 14.07.2021 kandidati Sandër Beci u njoftua me shkrim, në rrugë elektronike, për t'u paraqitur brenda tre ditëve në zyrën e posaçme të KED-së për tërheqjen e formularëve standard dhe të udhëzimeve të nevojshme për vijimin e procedurës së verifikimit të kandidimit të tij. Ky njoftim u krye në zbatim të pikës 22 të vendimit nr. 4/2019 të KED-së, në adresën e postës elektronike të deklaruar nga vetë kandidati Sandër Beci dhe kopje e email-it është administruar në dosjen e kandidimit.

8. Në datë 15.07.2021 kandidati Sandër Beci është paraqitur pranë KED-së dhe ka tërhequr për plotësim formularët standard të deklarimit dhe autorizimeve e duhura për procedurën e aplikimit për plotësimin e vendit vakant, objekt i kësaj procedure verifikimi.

9. KED, në zbatim të neneve 228, 229, 235, 236 dhe 237 të Ligjit nr. 115/2016 si dhe Vendimit nr. 4/2019 të KED, ka kryer veprimet verifikuese standarte si dhe hetim të thelluar nëse kandidati Sandër Beci plotëson kushtet dhe kriteret e kandidimit, që përcaktohen në pikat 4 dhe 5 të Nenit 125 të Kushtetutës dhe neni 7/a i Ligjit nr. 8577/2000.

10. KED me vendimin nr. 11, datë 20.10.2021 vendosi “*Miratimin e formularit të vetëdeklarimit nga kandidati për anëtar i Gjykatës Kushtetuese për pozicione drejtuese të mbajtura në parti politike gjatë 10 viteve të fundit nga data e kandidimit*”, me efekt dhe fuqi juridike deri më datë 31.12.2021. Ky vendim hyri në fuqi me botimin në Fletoren Zyrtare nr. 164, datë 22.10.2021. Në vijim, në datë 25.10.2021 është njoftuar me e-mail kandidati Sandër Beci të paraqes këtë formular të plotësuar, jo më vonë se 3 ditë nga marrja e këtij njoftimi. Në datë 26.10.2021 kandidati Sandër Beci ka dorëzuar të plotësuar formularin e vetëdeklarimit.

11. KED administroi Raportin Përfundimtar në lidhje me verifikimin e kandidatëve që kanë aplikuar për anëtarë të Gjykatës Kushtetuese, sipas përcaktimeve të ligjit nr. 138/2015 “*Përgarantimin e integritetit të personave që zgjidhen, emërohen ose ushtrojnë funksione publike*”, i ndryshuar (në vijim ligji nr. 138/2015) të përgatitur nga struktura përgjegjëse e KED për Dekriminalizimin. Ky raport u përfshi në dosjen e kandidimit të kandidatit Sandër Beci.

12. Gjatë procedurës së verifikimit dhe sipas komunikimit të Këshillit në rrugë elektronike më datë 02.11.2021, kandidati Sandër Beci ka dërguar në rrugë elektronike në datë 05.11.2021 shpjegimet përkatëse dhe dokumentacion bashkëngjitur, për çështje të lidhura me verifikimin e kandidaturës së tij.

13. Në përfundim të veprimeve dhe procedurave të verifikimit, në zbatim të neneve 228, 229, 235, 236 dhe 237 të ligjit nr. 115/2016 si dhe pikës 29 të Vendimit nr. 4/2019 të KED, duke vlerësuar paraprakisht se nuk ka të dhëna që mund të sjellin ndalimin e kandidimit, anëtarja relatore e KED ka proceduar me përgatitjen e relacionit përkatës dhe e ka dërguar çështjen për shqyrtim në mbledhjen e Këshillit.

14. Në zbatim të pikës 33 të Vendimit nr. 4/2019 të KED, Kryetari ka thirrur mbledhjen e Këshillit duke njoftuar anëtarët për zhvillimin e saj në datë 03.12.2021, rendin e ditës si edhe duke i bashkëlidhur njoftimit aktet e çështjes. Në rendin e ditës është përfshirë shqyrtimi i relacionit “*Mbi procedurën e verifikimit të kandidaturës së zotit Sandër Beci në vendin vakant për Gjyqtar në Gjykatën Kushtetuese, shpallur nga Gjykata e Lartë në datën 22.11.2018, datë 19.04.2019 dhe rishpallur në datë 03.06.2021*”.

15. Në zbatim të pikës 34 të Vendimit nr. 4/2019, dita dhe koha e zhvillimit të mbledhjes së bashku me relacionin e përgatitur nga relatori, i është njoftuar kandidatit Sandër Beci.

16. I njëjti njoftim, së bashku me dokumentacionin e përgatitur nga relatorja mbi veprimet e kryera gjatë procedurës së verifikimit, si edhe materialet të çështjes, iu dërgua edhe Avokatit të Popullit.

17. Dita dhe koha e zhvillimit të mbledhjes, rendi i ditës dhe relacioni i përgatitur për kandidatin Sandër Beci u është njoftuar edhe subjekteve, të cilët sipas ligjit ftohen të marrin pjesë në mbledhjen e KED-së.

18. Dita dhe koha e zhvillimit të mbledhjes së KED-së, si dhe rendi i ditës janë njoftuar publikisht në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

19. Në mbledhjen e datës 03.12.2021, pas relatimit të çështjes nga anëtarja relatores dhe shpjegimeve mbi pyetjet sqaruese të drejtuara nga anëtarët e tjerë, KED dëgjoi qëndrimin e Avokatit të Popullit lidhur me mënyrën e procedimit të ndjekur për verifikimin e kandidatit Sandër Beci si dhe dëgjoi mendimet e përfaqësuesve të autorizuar të Presidentit të Republikës dhe Kryetarit të Kuvendit, si subjekte të ftuara nga KED.

20. Avokati i Popullit zonja Erinda Ballanca nuk parashtrroi vërejtje në lidhje me mënyrën e procedimit të ndjekur për verifikimin e kandidatit Sandër Beci. Avokati i Popullit lidhur me këtë rast kandidimi u shpreh se: *“Ne e kemi parë relacionin dhe kemi bërë përmbledhjen tonë, nuk gjejmë çështje për të cilat kemi nevojë të pyesim, jemi të qartë.”*

## **II. Të dhëna dhe rezultatet e procedurës së verifikimit:**

21. Kandidati Sandër Beci është me shtetësi shqiptare, me numër personal të identifikimit H40806119S. Ai ka kryer studimet në vitet 1992-1996 në Universitetin “Luigj Gurakuqi” Shkodër, Fakulteti i Drejtësisë, Dega Juridik dhe është diplomuar Jurist”, i pajisur me Diplomë Nr. 32, Nr. 4826 regj., datë 04.07.1996.

22. Nga dokumentacioni i paraqitur rezulton se kandidati Sandër Beci ka ushtruar veprimtaritë profesionale të mëposhtme:

- a) Anëtar i Këshillit të Lartë të Prokurorisë 19 dhjetor 2018 e në vazhdim;*
- b) Pedagog me kohë të plotë pranë Universitetit “Luigj Gurakuqi”, Fakulteti i Drejtësisë, Shkodër për periudhën Shtator 1996- 19 dhjetor 2018.*

Kjo përvojë profesionale vërtetohet respektivisht me vërtetimin nr. 1791 prot, datë 02.07.2021 dhe Vërtetimin nr. 2075 prot, datë 01.07.2021, të cilat janë të administruara në dosjen e kandidimit.

23. Lidhur me kushtin e kandidimit të parashikuar nga Neni 125 pika 5 i Kushtetutës dhe neni 7/a pika 1, shkronja “c” i ligjit nr. 8577/2000, që kandidati të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë dhjetë viteve të fundit nga data e kandidimit, verifikimi u krye për periudhën 10 vjeçare nga data e kandidimit: 05.07.2011 – 05.07.2021.

24. Lidhur me *funksionet politike në administratën publike*, nga jetëshkrimi i kandidatit dhe aktet e administruara në dosjen e kandidimit, nuk rezulton që kandidati Sandër Beci të ketë ushtruar funksione politike në administratën publike.

25. Sa i takon *pozicioneve drejtuese në partitë politike*, KED në datat 03.08.2021, 30.09.2021 dhe 07.10.2021 i është drejtuar me kërkesë për informacion partive politike, duke i bashkëlidhur listat e të gjithë kandidatëve për gjyqtar në Gjykatën Kushtetuese. Kërkesave të KED iu janë përgjigjur

gjithsej 8 parti politike dhe secila prej tyre konfirmon në thelb se kandidati Sandër Beci duke filluar nga viti 2011, nuk ka mbajtur funksione drejtuese apo të ketë qenë anëtare partie.

26. Duke qenë pa përgjigje nga pjesa më e madhe e partive politike, për vijueshmërinë e procesit mbi një bazë të ligjshme, KED si diskutoi gjerësisht këtë çështje, me vendimin nr. 11, datë 20.10.2021 vendosi “*Miratimin e formularit të vetëdeklarimit nga kandidati për anëtar i Gjykatës Kushtetuese për pozicione drejtuese të mbajtura në parti politike gjatë 10 viteve të fundit nga data e kandidimit*”, me efekt dhe fuqi juridike deri më datë 31.12.2021. Ky vendim hyri në fuqi me botimin në Fletoren Zyrtare nr. 164, datë 22.10.2021. Në vijim, në datë 25.10.2021 është njoftuar me e-mail kandidati Sandër Beci të paraqes këtë formular të plotësuar, jo më vonë se 3 ditë nga marrja e këtij njoftimi. Kandidati Sandër Beci në datë 26.10.2021, ka dorëzuar të plotësuar formularin e vetëdeklarimit, duke deklaruar se nuk ka pasur ndonjë pozicion drejtues në parti politike.

27. Lidhur me kushtin e kandidimit të parashikuar nga Neni 125 pika 5 i Kushtetutës dhe neni 7/a pika 1, shkronja “ç” të ligjit nr. 8577/2000, që kandidati: “ç) të mos jetë në procedim penal dhe të mos jetë dënuar me burgim për kryerjen e një vepre penale;” KED kreu veprimet verifikuese sipas përcaktimeve të Nenit 236 të ligjit nr. 115/2015 dhe ligjit nr. 138/2015.

28. Lidhur me verifikimin e të dhënave të dekriminalizimit, KED, në bazë të nenit 236 të ligjit nr. 115/2016 dhe të pikës 82 të vendimit nr. 4/2019 të KED-së, me shkresën nr. 80 prot., datë 29.07.2021, ka dërguar në Prokurorinë e Përgjithshme për kompetencë formularin e vetëdeklarimit të plotësuar (edhe) nga kandidati Sandër Beci sipas ligjit nr. 138/2015. Prokuroria e Përgjithshme, me shkresën nr. 1218/1 prot., datë 30.07.2021, ka dërguar pranë Këshillit të Emërimeve në Drejtësi pa veprim formularët e vetëdeklarimit, duke arsyetuar në thelb se “*sipas ligjit nr. 138/2015, vendimit nr. 17/2016 të Kuvendit dhe ligjit nr. 115/2016, organi përgjegjës për administrim e Formularëve të Vetëdeklarimit të kandidatëve për gjyqtarë në Gjykatën Kushtetuese, është Këshilli i Emërimeve në Drejtësi, që nëpërmjet strukturës përkatëse ... kryen verifikimin paraprak të të dhënave të deklaruara në të dhe kërkon verifikimin të plotë vetëm, a) kur subjekti nuk ka deklaruar asnjë fakt për të kaluarën kriminale dhe ka indicie... b) kur personat kanë deklaruar të dhëna për gjendjen e tyre gjyqësore, por organi vlerëson se duhet përcjell për të verifikuar saktësinë e të dhënave të pasqyruara...*”

29. Në kushtet kur ky qëndrim i Prokurorisë së Përgjithshme ishte i ndryshëm në raport me qëndrimin e mbajtur përgjatë veprimtarisë së KED-së për vitet 2019 dhe 2020, ndonëse kuadri ligjor nuk ka pësuar ndryshime, KED me shkresën nr. 209 prot., datë 01.10.2021 i ka dërguar përsëri Prokurorisë së Përgjithshme për kompetencë verifikimi (edhe) formularin e vetëdeklarimit të plotësuar nga kandidati Sandër Beci sipas ligjit nr. 138/2015. Prokuroria e Përgjithshme, me shkresën nr. 1407/1 prot., datë 11.10.2021 ka kthyer përgjigje duke bërë me dije se: “*... Në vijim të kërkesave tuaja, nga ana jonë i është përcjellë të gjitha prokurorive në rrethe, në mënyrë që përgjigjet t’ju kthehen sa më shpejtë të jetë e mundur. Theksojmë se në Prokurorinë e Përgjithshme nuk gjendet një databazë me të dhëna lidhur me informacionet e ardhura nga agjencitë ligjzbatuese në emër të shtetasve dhe për këtë arsye është e pamundur që të verifikohet nëse disponohen informacione në emër të kandidatëve për anëtarë të Gjykatës Kushtetuese*”. Në vijim, me shkresën nr. 234 prot., datë 15.10.2021 KED i është drejtuar Prokurorit të Përgjithshëm duke e vënë në dije të kërkesave drejtuar prokurorive të juridiksionit të përgjithshëm të shkallës së parë dhe të apelit në kuadër të verifikimit të formularit të vetëdeklarimit të plotësuar (edhe) nga kandidati Sandër Beci, sipas ligjit nr. 138/2015. Nga ana e Prokurorit të Përgjithshëm nuk është kthyer përgjigje.

30. Sa më lart, konstatohet se procedura e verifikimit të të dhënave të dekriminalizimit ka marrë kohë të konsiderueshme, duke tejkaluar dukshëm afatin ligjor 30 ditor dhe nuk ka përfunduar sipas nenit 236 pika 4 të ligjit nr. 115/2016 “Për organet e qeverisjes së sistemit të drejtësisë”. Ndërkaq, struktura përgjegjëse e KED për dekriminalizimin, ka hartuar raportin përkatës, i cili është pjesë e dosjes së kandidatit.

31. Gjithashtu, për verifikimin e integritetit, të lidhur me *pastërtinë e figurës dhe të gjendjes gjyqësore* të kandidatit Sandër Beci, në zbatim të shkronjës “ç” të pikës 1 të nenit 7/a të ligjit nr. 8577/2000, të nenit 236 të Ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, KED i është drejtuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve Drejtorisë së Sigurisë së Informacionit të Klasifikuar (*shkresa nr. 79 prot., datë 29.07.2021*); me kërkesë për informacion Shërbimit për Çështjet e Brendshme dhe Ankesat pranë Ministrisë së Brendshme (*shkresa nr. 81 prot., datë 29.07.2021*); me kërkesë për informacion Drejtorisë së Përgjithshme të Burgjeve (*shkresa nr. 133 prot., datë 30.07.2021; shkresa nr. 189 prot., datë 27.09.2021*); me kërkesë për informacion Drejtorisë së Përgjithshme të Gjendjes Civile (*shkresa nr. 134 prot., datë 30.07.2021*); me kërkesë për informacion Drejtorisë së Përgjithshme të Policisë së Shtetit (*shkresa nr. 190 prot., datë 27.09.2021*), me kërkesë për informacion Gjykatës së Rrethit Gjyqësor Tiranë (*shkresa nr. 180 prot., datë 09.09.2021*); me kërkesë për informacion Prokurorisë pranë Gjykatës së Shkallës së Parë Tiranë (*shkresa nr. 181 prot., datë 09.09.2021*); me kërkesë për informacion Prokurorive pranë Gjykatës së Shkallës së Parë, pranë Gjykatës së Apeleve dhe SPAK (*shkresa nr. 192 prot., datë 28.09.2021*); me kërkesë për informacion Prokurorisë pranë Gjykatës së Shkallës së Parë Shkodër (*shkresa nr. 237 prot., datë 18.10.2021*).

32. Drejtoria e Sigurisë së Informacionit të Klasifikuar me shkresën nr. 2613 prot., datë 23.08.2021 është përgjigjur se: *“në përfundim të procedurave të verifikimit, nuk disponohen të dhëna/informacione që bien në kundërshtim me kërkesat e pikës 89 gërmat “a” dhe “c” për integritetin e figurës së z. Sandër Pashuk Beci.”*

33. Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigje, me shkresën nr. 2083 prot., datë 20.10.2021, nga ku rezulton se, në lidhje me kandidatin Sandër Beci: *“nuk figuron i evidentuar për veprimtari kriminale.”*

34. Drejtoria e Përgjithshme e Burgjeve me shkresën nr. 8269/1 prot., datë 04.08.2021 dhe shkresën nr. 10348/1 prot., datë 30.09.2021, është përgjigjur se: *“rezulton i padënuar nga gjykata penale Shqiptare.”*

35. Drejtoria e Përgjithshme e Gjendjes Civile me shkresën nr. 4460/1 prot., datë 16.08.2021, është përgjigjur se: *“Nuk ka ndryshime në përbërësit e gjendjes civile.”*

36. Drejtoria e Përgjithshme e Policisë së Shtetit ka dërguar përgjigje me shkresën nr. 15756 prot., datë 11.10.2021, e cila është klasifikuar prej tyre “Konfidenciale”. KED, në vijim me shkresën nr. 228 prot., datë 15.10.2021, i ka kërkuar Drejtorisë së Përgjithshme të Policisë së Shtetit, deklasifikimin e shkresës nr. 15756 prot., datë 11.10.2021. Drejtoria e Përgjithshme e Policisë së Shtetit ka dërguar përgjigje, me shkresën nr. 7912 prot., datë 08.11.2021, nga ku rezulton se është deklasifikuar informacioni sipas shkresës nr. 15756 prot., datë 11.10.2021 me përmbajtjen se:

*“- Kandidatët për gjyqtar të Gjykatës Kushtetuese, me të dhënat sipas listës bashkëlidhur, nuk figurojnë të ndaluar/arrestuar nga strukturat e Policisë së Shtetit.*

- Nuk kanë gjeneralitete të tjera të regjistruara, përveç atyre të përmendura në listën bashkëlidhur.
- Nuk rezultojnë të jenë dëbuar nga territori i ndonjë shteti tjetër.
- Pas verifikimit të kryer në arkivin elektronik ZQK Interpol Tirana dhe sistemin ASF-2, të Interpolit, ka rezultuar se për këta shtetas nuk ka të dhëna për arrestime, ndalime, vendime për masa sigurimi apo urdhra kërkimi ndërkombëtar”.

37. Prokuroria pranë Gjykatës së Shkallës së Parë Shkodër me shkresat nr. 7197/1 prot.J.B, datë 08.10.2021 dhe nr. 7825/1 prot., datë 22.10.2021, në lidhje me listën e kandidatëve, përfshirë kandidatin Sandër Beci, ka bërë me dije KED se:

*“nga verifikimet e bëra në regjistrat elektronik të kallëzimeve dhe procedimeve penale në Prokurorinë pranë Gjykatës së Shkallës së Parë Shkodër, rezulton se aktualisht nuk ka të regjistruar apo hetim kallëzimi penal, procedim penal apo çështje të dërguar në gjykatë në emër të shtetasve të mësipërme.*

*Sqarojmë se, vetëm në lidhje me shtetasin Sandër Pashuk Beci, ka pasur dy procedime penale të regjistruara dhe të pushuara më pas.*

- *procedimi penal nr. 322/19 të vitit 2010, ku ka qenë person nën hetim, për veprën penale të parashikuar nga neni 248 i Kodit Penal. Në përfundim të hetimeve është vendosur pushimi çështjes më datë 06.01.2011, me arsyetimin se fakti nuk ekziston dhe nuk parashikohet nga ligji si vepër penale, sipas gërmave “a” dhe “b” të nenit 328 të K.Pr.Penale. Në këtë rast, ndaj këtij personi nuk është ngritur akuzë dhe nuk është marrë i pandehur. Gjithashtu nuk është caktuar masë sigurimi;*
- *Procedimi penal nr. 964 viti 2016, ku ka qenë person nën hetim për veprën penale të parashikuar në nenin 259 të Kodit Penal. Në përfundim të hetimeve është vendosur pushimi i çështjes më datë 17.02.2017, sipas gërmës “dh” të nenit 328 të K.Pr.Penale. nga verifikimi i akteve në dosje në këtë çështje, ndaj këtij personi nuk është ngritur akuzë dhe nuk është marrë i pandehur. Gjithashtu nuk është caktuar masë sigurimi.*

*Bashkëlidhur shkresës, ju kemi dërguar dy vendimet e pushimit të çështjeve për këto procedime. Nuk ka asnjë kallëzim apo procedim tjetër penal të regjistruar apo në hetim.”.*

38. Gjykata e Rrethit Gjyqësor Shkodër, me shkresën “Kthim përgjigje” nr. 1123/1 prot., datë 26.10.2021 informon KED se:

*“Referuar sa më sipër në lidhje me pikën e parë “Për pushimin e çështjes penale nr. 322/19 të vitit 2010”, datë 06.01.2011 ju informojmë se: Nga verifikimi me emrin e kallëzues Anjeza Skuteri (Hetova), nuk rezulton që kjo shtetase të ketë ushtruar ankim ndaj vendimit të mësipërm.*

*Në lidhje me pikën e dytë nga përmbajtja e vendimit të pushimit e akuzës penale”, datë 17.02.2017, rezulton se prokuroria ka regjistruar procedimin nr. 964/2016 mbi bazën e materialit të përcjellë nga Drejtoria e Policisë Vendore Shkodër, dhe nga përmbajtja e tij nuk rezulton të pasqyrohet kallëzues.*

*U kërkua me emrat Merita Hysa, Mimoza Priku, Eduard Ndreca, Brunilda Allushi, Ndoc Deda, Sandër Beci, Dorina Keli, Klaudia Filipi, Xhevat Gjukuraj, Myfid Tukaj, Artan Xhaxhi, Xhuliana Leka, Gjovalin Gjini, Renato Trushi, Bernard Hila, Jurgen Haberi, Rokin Daberdaku, Roland Ilija, Simon Lufi, Arsen Lekaj, Vehbi Bala (Vebi Bala), Ermal Lera, Emanuela Bushi, Bresena Kopluku (Brisena Kopluku), Nevila Dibra, Pranvera Teli, Bendis Kraja, Anisa Kosteri, Rezarta*

*Draçini, Ildir Duhaxhi, Ardian Hoti, Bajram Xhafa, Artan Haxhi, Paulina Hoxha, Virut Bushati (Virtut Bushati), Andi Fishta, Alketa Hoti, Mark Trushi, Manuela Mustafaj, Armelinda Lleshaj dhe Gasper Kokaj, të gjithë këta të përshkruar në vendimin e pushimit të procedimit penal nr. 964 viti 2016, datë 17.02.2017.*

*Njëkohësisht asnjë nga këta vendime të Prokurorisë nuk u bë objekt shqyrtimi në gjykatë pasi janë marrë përpara ndryshimeve të Kodit të Procedurës Penale (Ndryshime që kanë hyrë në fuqi me datë 01.08.2017, datë pas të cilës vendimet e prokurorisë bëhen objekt shqyrtimi në gjykatë”.*

39. Duke veçuar përgjigjen e Prokurorisë pranë Gjykatës së Shkallës së Parë Shkodër sipas pikës 37 më sipër, Prokuroritë pranë Gjykatës së Shkallë së Parë, pranë Gjykatës së Apeleve dhe SPAK, kanë kthyer përgjigje nga të cilat ka rezultuar se ndaj kandidatit Sandër Beci, nuk ka kallëzime/procedime penale.

40. KED, në datë 02.11.2021, në zbatim të pikës 23, 25, 26 dhe 93 të Vendimit nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, e ka ftuar kandidatin Sandër Beci të paraqesë shpjegime me shkrim dhe dokumente shtesë që i vlerëson, për sa më poshtë:

*“Pranë sekretarisë së KED-së, ka mbërritur shkresa e Prokurorisë pranë Rrethit Gjyqësor Shkodër nr. 7197/1 prot.J.B, datë 08.10.2021 ka informuar KED-në se në lidhje me çështjet e hetuara rezulton se për periudhën kohore 2011-2021, rezultoi të jetë regjistruar:*

- *procedimi penal nr. 322/19 të vitit 2010, ku ka qenë person nën hetim, për veprën penale të parashikuar nga neni 248 i Kodit Penal. Në përfundim të hetimeve është vendosur pushimi çështjes më datë 06.01.2011, me arsyetimin se fakti nuk ekziston dhe nuk parashikohet nga ligji si vepër penale, sipas gërmave “a” dhe “b” të nenit 328 të K.Pr.Penale. Në këtë rast, ndaj këtij personi nuk është ngritur akuzë dhe nuk është marrë i pandehur. Gjithashtu nuk është caktuar masë sigurimi;*
- *Procedimi penal nr. 964 viti 2016, ku ka qenë person nën hetim për veprën penale të parashikuar në nenin 259 të Kodit Penal. Në përfundim të hetimeve është vendosur pushimi i çështjes më datë 17.02.2017, sipas gërmës “dh” të nenit 328 të K.Pr.Penale. nga verifikimi i akteve në dosje në këtë çështje, ndaj këtij personi nuk është ngritur akuzë dhe nuk është marrë i pandehur. Gjithashtu nuk është caktuar masë sigurimi.*

*Me shkresën nr. 1123/1 prot., datë 26.10.2021 Gjykata e Shkallës së Parë Shkodër, ka informuar se: Nuk rezulton që personat kallëzues në procedimin penal nr. 322/19 të vitit 2010, parashikuar nga neni 248 i Kodit Penal, i cili është pushuar në datë 06.01.2011 si dhe procedimi penal nr. 964 viti 2016, për veprën penale të parashikuar në nenin 259 të Kodit Penal, për të cilën është vendosur pushimi i çështjes në datë 17.02.2017” të kenë ushtruar ankim ndaj vendimeve të pushimit”.*

41. Kandidati Sandër Beci, në datë 05.11.2021, në rrugë elektronike, i ka dërguar KED shpjegimet dhe dokumentacionin si vijon:

*“Në lidhje me kërkesën Tuaj dërguar në rrugë elektronike në datë 02.11.2021, me lejoni të shpjegoj sa më poshtë:*

**1. Procedimi penal nr. 322 viti 2010.**



Në vitin 2011, me sa kujtoj, jam vënë në dijeni se Prokuroria pranë Gjykatës së Shkallës së Parë Shkodër kishte zhvilluar hetime lidhur me një ankim të një qytetari. Për këtë më ka njoftuar organi i Prokurorisë, pasi me ka kërkuar të nënshkruaj me sa kujtoj zgjatjen e afatit të hetimit.

Në vitin 2012, Prokuroria me ka komunikuar vendimin e datës 06.01.2012 për pushimin e procedimit penal Nr. 322 të vitit 2010. Nga vendimi i pushimit, rezultonte se Prokuroria Shkodër kishte zhvilluar hetime në bazë të kallëzimit të shtetas Anjeza Hotova, pedagoge po në këtë universitet, e cila kishte kallëzuar disa prej pedagogeve të Universitetit, të Fakultetit të Drejtësisë. Faktet objekt kallëzimi lidheshin me një komision diplome ku kallëzuesja pretendonte se, në cilësinë e anëtares së këtij Komisioni, nuk ishte marrë në konsideratë qëndrimi i saj.

Prokuroria kishte kryer hetime, duke përfshirë edhe veprime me mjetet speciale të hetimit, si përgjime të komunikimeve telefonike, përgjime dhe vëzhgime të komunikimeve ambientale si dhe veprime simuluese. Në përfundim, Prokurori ka konstatuar se faktet e kallëzuaras nuk ekzistojnë dhe nuk parashikohen nga ligji si vepër penale.

Në këto rrethana, Prokuroria në datë 06.01.2012, në mbështetje të nenit 328 pikat "a" dhe "b" të K.Pr.Penale ka vendosur pushimin e hetimeve të këtij procedimi penal.

Ky vendim pushimi është kontrolluar nga Drejtuesi i Prokurorisë sipas kërkesave të nenit 24 të K.Pr.Penale dhe pasi është gjendur në pajtim të plotë me provat dhe faktet, është miratuar prej tij. Njëkohësisht vendim i pushimit nuk është ankimuar as tek Prokurori me i Lartë/Prokuroria e Përgjithshme dhe as në Gjykatë sipas kërkesave të nenit 329 të Kodit Penal

Bashkëlidhur ju dërgoj kopje të vendimit të pushimit të procedimit penal nr. 322 të vitit 2010, administruar nga ana ime me shkresën Nr. 1181/1, datë 04.11.2021 të Prokurorisë Pranë Gjykatës së Shkallës së Parë Shkodër.

## **2. Procedimi penal nr. 964 viti 2016.**

Në fund të vitit 2016 jam thirrur për të dhënë shpjegime nga Prokuroria pranë Gjykatës së Shkallës së Parë Shkodër dhe aty jam vënë në dijeni se kjo prokurori po zhvillonte hetime për disa prej pedagogeve të Universitetit Shkodër, përfshi dhe personin tim.

Në vitin 2017, Prokuroria më ka komunikuar vendimin e datës 17.02.2017 për pushimin e procedimit penal Nr. 964 të vitit 2016.

Nga vendimi i pushimit, rezultonte se Prokuroria në bazë të referimit të Drejtorisë së Policisë Vendore Shkodër, kishte regjistruar procedimin penal Nr. 964. Në këtë kuadër Prokuroria kishte kryer hetime, duke përfshirë edhe veprime me mjetet speciale të hetimit, si përgjime të komunikimeve telefonike, përgjime dhe vëzhgime të komunikimeve ambientale etj. dhe në përfundim ka vendosur të pushojë hetimet për disa prej pedagogeve ku përfshihesha edhe unë.

Në këtë procedim penal, pavarësisht se si është shprehur Prokuroria në dispozitivin e vendimit, mua kurrë nuk më është komunikuar ndonjë akuzë dhe cilësia e të pandehurit, gjë e cila konfirmohet edhe nga aktet e dosjes dhe përgjigja e organit të prokurorisë.

Ky vendim pushimi është kontrolluar nga Drejtuesi i Prokurorisë sipas kërkesave të nenit 24 të K.Pr.Penale dhe pasi është gjendur në pajtim të plotë me provat dhe faktet është miratuar prej tij. Njëkohësisht vendimi i pushimit nuk është ankimuar as tek Prokurori me i Lartë/Prokuroria e Përgjithshme dhe as në Gjykatë sipas kërkesave të nenit 329 të Kodit Penal.

*Bashkëlidhur ju dërgoj kopje të vendimit të pushimit të procedimit penal nr. 964 të vitit 2016 administruar nga ana ime me shkresën Nr. 1181/1, datë 04.11.2021 të Prokurorisë Pranë Gjykatës së Shkallës së Parë Shkodër”.*

42. Për verifikimin e të shkuarës personale referuar nenit 229 të Ligjit nr. 115/2016, KED me shkresën nr. 78 prot., datë 29.07.2021 i dërgoi për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit formularin përkatës të plotësuar sipas ligjit (edhe) nga kandidati Sandër Beci. Neni 29 i ligjit nr. 45/2015 “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë” përcakton se Autoriteti, në kuadër të vlerësimit, sipas legjislacionit përkatës, të cilësive etike, morale dhe profesionale të kandidatëve për t’u emëruar ose ngritur në detyra, ndër të tjera, për anëtar të Gjykatës Kushtetuese, i kthen përgjigje institucionit verifikues nëse, për periudhën para datës 02.07.1991, kandidati: *a) ka qenë ose jo person në ndjekje për spiunazh apo terrorizëm; b) ka qenë ose jo anëtar, bashkëpunëtor, i favorizuar i ish-Sigurimit të Shtetit, sipas përcaktimeve të këtij ligji; c) figuron ose jo në dokumente të ish -Sigurimit të Shtetit.* Autoriteti për Informimin mbi Dokumentet e Ish-Sigurimit të Shtetit, me shkresën nr. 1143/4 prot., datë 16.08.2021, ka dërguar vendimin nr. 351, datë 10.08.2021 pranë Këshillit të Emërimeve në Drejtësi me rezultatet e kontrollit të ushtruar për kandidatin Sandër Beci, duke ardhur përfundimet se: *“Për zotin Sandër Pashuk Beci, nga verifikimet e kryera deri tani nuk figurojnë të ketë materiale në dokumentet të ish- Sigurimit të Shtetit në emër të tyre, sipas nenit 29, pika 2 të ligjit nr. 45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.*

43. Për verifikimin e kushtit të kandidimit të përcaktuar nga neni 7/a, pika 1, shkronja “d” i ligjit nr. 8577/2000, që kandidati *“të mos jetë larguar nga detyra për shkaqe disiplinore dhe të mos ketë masë disiplinore në fuqi”*, KED vlerësoi t’i drejtohet me kërkesë për informacion institucioneve, mbështetur në të dhënat në dosjen e kandidimit lidhur me funksionin publik dhe veprimtarinë profesionale të kandidatit si: Universitetit “Luigj Gurakuqi” Shkodër (*shkresa nr. 140 prot., datë 03.08.2021*), Këshillit të Lartë të Prokurorisë (*shkresa nr. 141 prot., datë 03.08.2021*) dhe Inspektorit të Lartë të Drejtësisë (*shkresa nr. 237 prot., datë 22.11.2021*). Lidhur me të dhënat e kërkuara, Këshilli ka marrë përgjigje me shkrim nga Këshilli i Lartë i Prokurorisë (*shkresa nr. 1991/1 prot., datë 06.08.2021*), Universiteti i Shkodrës “Luigj Gurakuqi” (*shkresa nr. 2469/1 prot., datë 10.08.2021*) dhe Inspektori i Lartë i Drejtësisë (*shkresa nr. 4189/1 prot., datë 23.11.2021*). Në përmbajtje të përgjigjeve, këto institucione konfirmojnë se periudha e punësimit të deklaruar nga kandidati është e saktë, ka deklaruar pozicionet e punës konkrete, si dhe kandidati nuk ka marrë apo ka masa disiplinore në fuqi. Inspektoriati i Lartë i Drejtësisë konfirmon se *“deri më datë 23.11.2021 kundrejt subjektit Sandër Beci nuk është nisur hetim disiplinor dhe nuk është paraqitur kërkesë për procedim disiplinor.”*

44. Neni 125 pika 5 i Kushtetutës parashikon se kriteret e tjera për emërimin dhe zgjedhjen e gjyqtarëve të Gjykatës Kushtetuese rregullohen me ligj. Neni 7/a, pika 1, shkronja “dh” e ligjit nr. 8577/2000 parashikon si kusht kandidimi kalimin me sukses nga kandidati të procesit të kontrollit dhe verifikimit të pasurisë së tij personale dhe të familjarëve të tij, sipas ligjit.

45. Për llogaritjen dhe ndjekjen e zbatimit të afatit të parashikuar në pikën 2 të nenit 235 të ligjit nr. 115/2016, si edhe në zbatim të pikës 60 të vendimit nr. 4/2019 të KED-së, me shkresën nr. 77 prot., datë 29.07.2021, KED i ka dërguar Inspektoratit të Lartë të Deklarimit të Pasurive dhe të Konfliktit të Interesit (*në vijim ILDKPKI*) listën e kandidatëve dhe personave të lidhur me ta që i nënshtrohen procedurës së verifikimit të pasurisë. Kësaj shkrese drejtuar ILDKPKI-së, ndërmjet të tjerave, iu bashkëlidh edhe deklarata e nënshkruar nga kandidati Sandër Beci, ku tregohet se

është pajisur me formularët e deklaramit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

46. ILDKPKI, në zbatim të nenit 235 të ligjit nr. 115/2016, të ligjit nr. 9049/2003 dhe ligjit nr. 9367/2005, me shkresën nr. 3211/4 prot., datë 03.09.2021, ka dërguar pranë Këshillit të Emërimeve në Drejtësi, Aktin Përfundimtar nr. 564/23, datë 08.09.2021 dhe rezultatet e kontrollit të ushtruar për kandidatin Sandër Beci, ku në përfundim të analizës së hollësishtme financiare konkludon se:

- a) *Deklarimi është i saktë në përputhje me ligjin;*
- b) *Ka burime financiare të ligjshme për të justifikuar pasurinë;*
- c) *Nuk ka kryer fshehje të pasurisë;*
- ç) *Nuk ka kryer deklaramit të rremë;*
- d) *Nuk gjendet në situatën e konfliktit të interesave.*

47. Gjithashtu, në funksion të ushtrimit të kompetencave të tij për verifikimin e plotësimin të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe 235 të ligjit nr. 115/2016, të shkronjës “e” të pikës 20, 24, shkronjës “b” të pikës 60 të vendimit nr. 4/2019 të KED-së, janë kryer nga KED veprime të tjera verifikuese të kërimit nga subjekte publike dhe private, të të dhënave mbi pasuritë, interesat private dhe detyrimet financiare që ekzistojnë në emër dhe për llogari të kandidatit Sandër Beci dhe personave të lidhur me të. Konkretisht, KED, në datat 29.07.2021, 30.07.2021, 27.09.2021, 30.09.2021 dhe 14.10.2021, i është drejtuar me kërkesa për informacion dhe ka marrë përgjigjet përkatëse me të dhënat e kërkuara nga secili prej institucioneve publike dhe subjekteve private (të cilat janë administruar në dosjen e kandidimit), si vijon:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Parë e Investimeve, (6) Banka Intesa Sanpaolo, (7) Banka Kombëtare Tregtare, (8) Banka Procredit, (9) Banka Raiffeisen, (10) Banka Societe Generale, (11) Banka Tirana dhe (12) Banka Union.
- b) Institucione financiare të licencuara nga Banka e Shqipërisë: (1) Ak-Invest, (2) Albania Leasing, (3) Capital Invest, (4) Easypay sh.p.k, (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k. (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Tirana Factoring & Lease, (15) Tranzit sha, (16) Union Financiar Tiranë.
- c) Subjekte financiare të licencuar nga AMF: (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigi, (5) Fondi i Investimit Raiffeisen Vision, (6) Fondi i Investimit WVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal, (9) ABI INVEST, (10) ALBSIG INVEST, (11) Final sh.p.k.
- ç) Institucione të tjera publike si: (1) Agjencia Shtetërore e Kadastrës, (2) DPSHTRR, (3) D.P.Tatimeve, (4) M.Drejtësisë, (5) OSHEE, (6) QKB, (7) UKT.

48. Në përgjigje të kërkesave për informacion, të gjitha institucionet publike dhe subjektet private të listuara më sipër, me përjashtim të shoqërisë Final sha dhe Final sh.p.k, kanë dërguar përgjigjet përkatëse ku përmbahen të gjitha të dhënat e kërkuara mbi pasuritë e kandidatëve, nëse kanë pasur të tilla për secilin prej tyre, përfshirë edhe kandidatin Sandër Beci. Moskthimi i përgjigjeve nga ana e shoqërisë Final sh.a. dhe Final sh.p.k, nuk pengon vijimin e procesit, për sa kohë nga ana e

ILDKPKI është ezauruar në mënyrë shteruese verifikimi i pasurisë së kandidatit Sandër Beci dhe ka rezultuar pa probleme. Nga përgjigjet e administruara rezulton se nuk ka informacione shtesë për pasuritë dhe interesat private dhe ato përputhen me ato të ILDKPKI-së.

### III. Vlerësimi i Këshillit të Emërimeve në Drejtësi:

49. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidatit, vlerëson se duhet të procedojë me vendim për lejimin e kandidatit Sandër Beci për vendin vakant në Gjykatën Kushtetuese të shpallur nga Gjykata e Lartë në datën 22.11.2018, 19.04.2019 dhe rishpallur në datë 03.06.2021.

50. Në pikën 4 dhe 5 të nenit 125 të Kushtetutës, parashikohet se :

*“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.*

*5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kriteret e tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj.”*

51. Në pikën 1 dhe 2 të nenit 7/a të Ligjit nr. 8577/2000 parashikohet se:

*“1. Gjyqtari i Gjykatës Kushtetuese mund të zgjidhet shtetasi shqiptar që përmbush këto kushte:*

*a) të ketë zotësi të plotë për të vepruar;*

*b) të ketë mbaruar arsimin e lartë juridik, Diplomë e Nivelit të Dytë;*

*c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;*

*ç) të mos jetë në procedim penal dhe të mos jetë dënuar me burgim për kryerjen e një vepre penale;*

*d) të mos jetë larguar nga detyra për shkaqe disiplinore dhe të mos ketë masë disiplinore në fuqi;*

*dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij, sipas ligjit.*

*2. Kandidati që përmbush kushtet e parashikuara në pikën 1 të këtij neni, duhet të plotësojë edhe këto kritere:*

*a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, jurist i nivelit të lartë në administratën publike;*

*b) të ketë një veprimtari të njohur në fushën e të drejtës kushtetuese, të drejtave të njeriut ose sfera të tjera të së drejtës;*

*c) të jetë vlerësuar për aftësitë profesionale dhe integritetin etik e moral.”.*

52. Duke iu referuar rezultateve të verifikimit të përshkuara në pjesën II të këtij vendimi, të administruara në dosjen e kandidimit si dhe dokumentacionit dhe spjegimeve të paraqitura nga kandidati Sandër Beci, KED vlerëson:

*i. Verifikimi shtetësisë dhe i zotësisë së plotë për të vepruar:*

53. Neni 7/a, pika 1, shkronja “a” i ligjit nr. 8577/2000 parashikon si kusht kandidimi shtetësinë shqiptare dhe zotësinë e plotë për të vepruar. Kandidati Sandër Beci është me shtetësi shqiptare dhe përgjatë procedurës së verifikimit nuk ka rezultuar asnjë e dhënë që këtij kandidati t’i jetë hequr apo t’i jetë kufizuar zotësia për të vepruar.

ii. *Verifikimi i arsimit:*

54. Neni 125 pika 4 e Kushtetutës dhe neni 7/a pika 1 shkronja “b” e ligjit nr. 8577/2000 parashikojnë si kusht kandidimi “*arsimin e lartë juridik, Diplomë e Nivelit të Dytë*”. Kandidati Sandër Beci ka kryer studimet në vitet 1983-1987 në Universitetin e Tiranës, Fakulteti i Shkencave Politike Juridike. Ai është diplomuar “Jurist”, pajisur me Diplomë nr. 1756 B, datë 27.06.1987. Në zbatim të ligjit nr. 80/2015 “*Për arsimin e lartë dhe kërkimin shkencor në institucionet e arsimit të lartë në Republikën e Shqipërisë*” ky lloj arsimimi kualifikohet arsim i lartë juridik, Diplomë e Nivelit të Dytë.

iii. *Përvoja profesionale:*

55. Neni 125 pika 4 i Kushtetutës dhe neni 7/a pika 2 e ligjit nr. 8577/2000 parashikojnë si kusht kandidimi përvojën e punës prej të paktën prej 15 vjet në detyrën e gjyqtarit, prokurorit, avokatit, profesorit ose lektorit të së drejtës, nëpunësit/juristit të nivelit të lartë në administratën publike, me një veprimtari të spikatur në fushën e të drejtës kushtetuese, të drejtave të njeriut ose në sfera të tjera të së drejtës, si dhe të jetë vlerësuar për aftësitë profesionale dhe integritetin etik e moral.

56. Kandidati Sandër Beci është anëtar i Këshillit të Lartë të Prokurorisë, nga data 19.12.2018. Ai është konsideruar i zgjedhur në këtë funksion me mandat tre vjeçar me vendimin e Kuvendit Nr. 19/2018 “*Për zgjedhjen e anëtarëve të Këshillit të Lartë të Prokurorisë, sipas ligjit nr. 115/2016 “Për organet e qeverisjes së sistemit të drejtësisë” (në vijim Vendimi nr. 19/2018 i Kuvendit)*”. Neni 102 i ligjit nr. 115/2016 përcakton se: “*1. Anëtari i Këshillit të Lartë të Prokurorisë ka statusin e magjistratit, sipas dispozitave të ligjit “Për statusin e gjyqtarëve dhe prokurorëve në Republikën e Shqipërisë”, përveç rasteve kur parashikohet ndryshe nga ky ligj. 2. Anëtari i Këshillit gëzon pagën dhe përfitimet e gjyqtarit të Gjykatës së Lartë.*” Sa më sipër, kandidati Sandër Beci rezulton se ushtron prej 2 vjet e 11 muaj (2 vjet e 6 muaj në momentin e kandidimit) një funksion në organet e sistemit të drejtësisë, me statusin e magjistratit, përkatësisht të gjyqtarit të Gjykatës së Lartë. Kjo veprimtari profesionale përfshihet në përvojën e punës, të kërkuar sipas dispozitave të lartcituara.

57. Kandidati Sandër Beci rezulton i zgjedhur anëtar i Këshillit të Lartë të Prokurorisë nga trupa e pedagogëve të Fakulteteve të Drejtësisë, referuar përcaktimeve të nenit 134 e vijues të Ligjit nr. 115/2016. Përkatësisht, kandidati Sandër Beci ka ushtruar veprimtarinë profesionale si pedagog me kohë të plotë pranë Universitetit “Luigj Gurakuqi”, Fakulteti i Drejtësisë, Shkodër për periudhën nga muaji Shtator 1996 deri në dhjetor 2018, pra më shumë se 22 vjet. Ushtrimi i detyrës së profesorit ose lektorit të së drejtës, së paku për 15 vjet, është veprimtari profesionale e parashikuar e tillë shprehimisht nga Neni 125 pika 4 i Kushtetutës dhe neni 7/a pika 2, germa “a” e ligjit nr. 8577/2000 si kusht për lejimin e kandidimit.

58. Këshilli, bazuar në jetëshkrimin e kandidatit, përvojën e tij të punës dhe në tërësi informacionin që përmban dosja e kandidimit si dhe në referim të kushteve të kandidimit të përcaktuar nga neni 134, pika 2, i ligjit nr. 115/2016, arrin në përfundimin se kandidati Sandër Beci ka ushtruar veprimtarinë profesionale të kërkuar, sikurse përcaktohet ky kusht kandidimi nga pika 4 e nenit 125 të Kushtetutës dhe pika 2, e nenit 7/a të ligjit nr. 8577/2000.

iv. *Verifikimi i funksioneve politike:*

59. Përsa i përket kushtit të kandidimit të parashikuar nga Neni 125, pika 5 i Kushtetutës dhe neni 7/a, pika 1, shkronja “c” i ligjit nr. 8577/2000, pra që kandidati të mos ketë ushtruar

funksiione politike në administratën publike dhe të mos ketë mbajtur pozicione drejtuese në parti politike gjatë dhjetë viteve të fundit nga data e kandidimit, sikurse parashtrohet edhe në pikat 23 dhe 24 më sipër, nga aktet e administruara në dosjen e kandidimit lidhur me përvojën profesionale, konstatohet se kandidati Sandër Beci nuk ka ushtruar funksione politike në administratën publike.

60. Sa i takon *pozicioneve drejtuese në partitë politike*, nga përgjigjet e dhëna nga 8 parti politike konfirmohet në thelb se *“duke filluar nga viti 2011 kandidati nuk ka mbajtur funksione drejtuese apo të ketë qenë anëtare partie”*. Kandidati Sandër Beci në datë 26.10.2021, ka dorëzuar të plotësuar formularin e vetëdeklarimit *“për anëtar i Gjykatës Kushtetuese për pozicione drejtuese të mbajtura në parti politike gjatë 10 viteve të fundit nga data e kandidimit”*, miratuar nga KED me vendimin nr. 11, datë 20.10.2021, duke deklaruar se nuk ka pasur ndonjë pozicion drejtues në parti politike.

61. Këshilli, bazuar në jetëshkrimin e kandidatit, përvojën e tij të punës dhe në tërësi rezultatet e verifikimit që përmban dosja e kandidimit si dhe, në referim të kushtit të kandidimit të përcaktuar nga neni 134, pika 2, germa “ë” i ligjit nr. 115/2016, vjen në përfundimin se kandidati Sandër Beci nuk gjendet në kushtet e ndalimit sipas dispozitave të lartcituara.

v. *Verifikimi i integritetit:*

62. Neni 125 pika 5 i Kushtetutës dhe neni 7/a pika 1, shkronja “ç” i ligjit nr. 8577/2000 përcakton si kusht kandidimi që kandidati: *“ç) të mos jetë në procedim penal dhe të mos jetë dënuar me burgim për kryerjen e një vepre penale.”* Neni 236 i ligjit nr. 115/2015 dhe ligji nr. 138/2015 *“Për garantimin e integritetit të personave që zgjidhen, emërohen ose ushtrojnë funksione publike”*, i ndryshuar (në vijim ligji nr. 138/2015) përcaktojnë që kandidati duhet të mos jetë i dënuar me burgim me vendim të formës së prerë, brenda ose jashtë territorit të Republikës së Shqipërisë, të mos ketë pasur masë sigurimi personal ose urdhër dëbimi, për një listë veprash penale të parashikuara shprehimisht nga ligji.

63. Lidhur me verifikimin e *të dhënave të dekriminalizimit*, siç parashtrohet në pikat 28, 29 dhe 30 më sipër, procedura e verifikimit nuk ka përfunduar sipas nenit 236 pika 4 të ligjit nr. 115/2016. Struktura përgjegjëse e KED për dekriminalizimin ka hartuar raportin përkatës, i cili është pjesë e dosjes së kandidatit. Megjithatë, Këshilli vlerëson të evidentojë se ligji nr. 138/2015, si dhe vendimi i Kuvendit nr. 17/2016 *“Për përcaktimin e rregullave të detajuara mbi zbatimin e ndalimeve të parashikuara në ligjin nr. 138 2015 ‘Për garantimin e integritetit të personave që zgjidhen, emërohen ose ushtrojnë funksione publike’”* rregullon situatën kur rezultatet e verifikimit mbyllen pas emërimit, edhe kur nga verifikimi rezultojnë kushte ndaluese të emërimit.

64. Gjithashtu, KED për verifikimin e integritetit, të lidhur me *pastërtinë e figurës dhe të gjendjes gjyqësore* të kandidatit Sandër Beci, në zbatim të shkronjës “ç” të pikës 1 të nenit 7/a të ligjit nr. 8577/2000, të nenit 236 të Ligjit nr. 115/2016, si edhe në zbatim të pikës 84 të Vendimit nr. 4/2019 të KED, i është drejtuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve institucioneve të treguara pikën 32 të këtij vendimi.

65. Drejtoria e Sigurisë së Informacionit të Klasifikuar me shkresën nr. 2613 prot., datë 23.08.2021, është përgjigjur se: *“në përfundim të procedurave të verifikimit, nuk disponohen të dhëna/informacione që bien në kundërshtim me kërkesat e pikës 89 germat “a” dhe “c” për integritetin e figurës së z. Sandër Pashuk Beci.*

66. Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigje, me shkresën nr. 2083 prot., datë 20.10.2021, sipas të cilës, në lidhje me kandidatin Sandër Beci: *"nuk figurojnë të evidentuar për veprimtari kriminale."*

67. Drejtoria e Përgjithshme e Burgjeve me shkresën nr. 8269/1 prot., datë 04.08.2021 dhe shkresën nr. 10348/1 prot., datë 30.09.2021, është përgjigjur se kandidati Sandër Beci: *"rezulton i padënuar nga gjykata penale shqiptare."*

68. Drejtoria e Përgjithshme e Gjendjes Civile me shkresën nr. 4460/1 prot., datë 16.08.2021, është përgjigjur se kandidati Sandër Beci: *"Nuk ka ndryshime në përbërësit e gjendjes civile."*

69. Drejtoria e Përgjithshme e Policisë së Shtetit ka dërguar përgjigje me shkresën nr. 15756 prot., datë 11.10.2021, e cila është klasifikuar prej tyre "konfidenciale". KED, në vijim me shkresën nr. 228 prot., datë 15.10.2021, i ka kërkuar Drejtorisë së Përgjithshme të Policisë së Shtetit, deklasifikimin e shkresës nr. 15756 prot., datë 11.10.2021. Drejtoria e Përgjithshme e Policisë së Shtetit ka dërguar përgjigje, me shkresën nr. 7912 prot., datë 08.11.2021, sipas të cilës është deklasifikuar informacioni i shkresës nr. 15756 prot., datë 11.10.2021 me përmbajtjen se:

*"- Kandidatët për gjyqtar të Gjykatës Kushtetuese, me të dhënat sipas listës bashkëlidhur, nuk figurojnë të ndaluar/arrestuar nga strukturat e Policisë së Shtetit.*

*- Nuk kanë gjeneralitete të tjera të regjistruara, përveç atyre të përmendura në listën bashkëlidhur.*

*- Nuk rezultojnë të jenë dëbuar nga territori i ndonjë shteti tjetër.*

*- Pas verifikimit të kryer në arkivin elektronik ZQK Interpol Tirana dhe sistemin ASF-2, të Interpolit, ka rezultuar se për këta shtetas nuk ka të dhëna për arrestime, ndalime, vendime për masa sigurimi apo urdhra kërkimi ndërkombëtar".*

70. Nga përmbajtja e informacioneve dhe akteve të dërguara në përgjigje të kërkesave të Këshillit si dhe pretendimet dhe dokumentacioni i paraqitur nga kandidati Sandër Beci, siç parashtrohet në pikat 37, 38, 40 dhe 41 më sipër, Këshilli konstaton se:

71. Pranë Prokurorisë së Gjykatës së Parë Shkodër ka pasur dy procedime penale të regjistruara në të cilat kandidati Sandër Beci ka qenë person nën hetim: (i) Procedimi penal nr. 322/19 të vitit 2010 për veprën penale "Shpërdorimi i detyrës", të parashikuar nga neni 248 i Kodit Penal. Në përfundim të hetimeve, me vendimin e datës 06.01.2011 të prokurorit së Rrethit Gjyqësor Shkodër është vendosur pushimi çështjes, me arsyetimin se fakti nuk ekziston dhe nuk parashikohet nga ligji si vepër penale, sipas gërmave "a" dhe "b" të pikës 1, të nenit 328 të K.Pr.Penale; (ii) procedimi penal nr. 964 viti 2016, për veprën penale "korrupsioni pasiv i personave që ushtrojnë funksione publike" të parashikuar në nenin 259 të Kodit Penal. Në përfundim të hetimeve, me vendimin e datës 17.02.2017 të Prokurorit është vendosur pushimi i akuzës/çështjes, me arsyetimin se *"del që i pandehuri nuk e kryer veprën ose nuk provohet se e ka kryer ai"* sipas gërmës "dh" të pikës 1 të nenit 328 të K.Pr.Penale.

72. Në lidhje me dy procedimet penale nr. 322/19 viti 2010 dhe nr. 964 viti 2016, ku kandidati Sandër Beci ka qenë person në hetim, Prokuroria pranë Gjykatës së Shkallës së Parë Shkodër me shkresat nr. 7197/1 prot.J.B, datë 08.10.2021 dhe nr. 7825/1 prot., datë 22.10.2021 konfirmon se *"ndaj këtij personi nuk është ngritur akuzë dhe nuk është marrë i pandehur. Gjithashtu nuk është caktuar masë sigurimi."* Në lidhje me vendimet e pushimit të çështjes/akuzës datë 01.01.2011 dhe datë 17.02.2017 për këto dy procedime penale, Prokuroria pranë Gjykatës së Shkallës së Parë Shkodër i ka konfirmuar KED se: *" nga verifikimet e bëra në dosjet përkatëse rezulton se ndaj*

*këtyre vendimeve nuk është bërë ankim në Gjykatë dhe as në Prokurorinë e Përgjithshme dhe se këto vendime nuk janë ndryshuar apo shfuqizuar dhe se nuk ka vendime gjyqësore apo vendim të Prokurorit të Përgjithshëm për vendimet e pushimit të mësipërm.” Gjykata e Rrethit Gjyqësor Shkodër me shkresën nr. 1123/1 prot., datë 26.10.2021 informon KED se: “Njëkohësisht asnjë nga këta vendime të Prokurorisë nuk u bë objekt shqyrtimi në gjykatë pasi janë marrë përpara ndryshimeve të Kodit të Procedurës Penale (Ndryshime që kanë hyrë në fuqi me datë 01.08.2017, datë pas të cilës vendimet e prokurorisë bëhen objekt shqyrtimi në gjykatë”.*

73. Prokuroritë pranë Gjykatës së Shkallë së Parë, pranë Gjykatës së Apeleve dhe SPAK kanë kthyer përgjigje pranë KED dhe nga përmbajtja e tyre konfirmohet fakti se ndaj kandidatit Sandër Beci *“nuk ka regjistrim hetim kallëzim penal, procedim penal apo çështje të dërguar në gjykatë.”*

74. Nisur nga rezultatet e verifikimit dhe në interpretim dhe zbatim të kushteve të kandidimit për anëtar të Gjykatës Kushtetuese, që përcakton ligji i posaçëm nr. 8577/2000, Këshilli konstaton se kandidati Sandër Beci nuk rezulton të jetë subjekt në ndonjë procedim penal, rrethanë e cila shpie në ndalimin e kandidimit sipas shkronjës “ç”, pika 1 e nenit 7/a të ligjit nr. 8577/2000, pra që kandidati duhet: *“ç) të mos jetë në procedim penal”.*

75. Këshilli konstaton se nuk ekziston as gjendja tjetër e parashikuar po nga kjo dispozitë e ligjit nr. 8577/2000 si kusht ndalues, pra që kandidati *“të mos jetë dënuar me burgim për kryerjen e një vepre penale”.* Këshilli vëren se ky kusht i kandidimit rezulton pothuajse i njëjtë me përcaktimet e ligjit nr. 115/2016 për kandidimin për anëtar të Këshillit të Lartë të Prokurorisë nga radhët e juristëve joprokurorë. Neni 134, pika 2, shkronja “e” e ligjit nr. 115/2016 për kandidatët që vijnë nga trupa e pedagogëve të fakulteteve të drejtësisë (dhe të Shkollës së Magjistraturës) përcakton si kusht që kandidatët: *“e) të mos kenë qenë dënuar me vendim gjyqësor të formës së prerë për kryerjen e një vepre penale.”.* Kandidati Sandër Beci ushtron nga dhjetor 2018 funksionin e anëtarit të Këshillit të Lartë të Prokurorisë, i zgjedhur sipas vendimit Nr. 19/2018 të Kuvendit nga radhët e trupës së pedagogëve.

76. Sa më sipër analizuar lidhur me rezultatet e verifikimit, Këshilli vjen në përfundimin se kandidati Sandër Beci, krahas plotësimit të saktë të formularit të vetëdeklarimit, përmbush kushtet e kandidimit të parashikuara nga shkronja “ç”, pika 2, neni 7 i ligjit nr. 8577/2000, pra që kandidati: *“ç) të mos jetë në procedim penal dhe të mos jetë dënuar me burgim për kryerjen e një vepre penale.”*

77. Në vijim të procedurave të verifikimit të integritetit, kandidati Sandër Beci ka dorëzuar të plotësuar në afat formularin e aplikimit “Për informim përpara emërimit/zgjedhjes në poste të larta”, parashikuar nga ligji nr. 45/2015. KED me shkresën nr. 78 prot., datë 29.07.2021 i dërgoi për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit formularin përkatës të plotësuar sipas ligjit nga kandidati Sandër Beci. Autoriteti për Informimin mbi Dokumentet e Ish-Sigurimit të Shtetit, me shkresën nr. 1143/4 prot., datë 16.08.2021, ka dërguar vendimin nr. 351, datë 10.08.2021 pranë KED me rezultatet e kontrollit të ushtruar, duke ardhur në përfundimet se, (edhe) për kandidatin Sandër Pashuk Beci: *“nga verifikimet e kryera deri tani nuk figurojnë të ketë materiale në dokumentet të ish- Sigurimit të Shtetit në emër të tyre, sipas nenit 29, pika 2 të ligjit nr. 45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.*

78. Nisur nga rezultatet e kontrollit të ushtruar nga Autoriteti për Informimin mbi Dokumentet e Ish-Sigurimit të Shtetit, Këshilli konstaton se kandidati Sandër Beci, krahas plotësimit të saktë të formularit përkatës të aplikimit, përmbush kushtet e parashikuara nga ligji 45/2015 për pastërtinë



e figurës së funksionarit kushtetuese në lidhje me sjelljen dhe veprimtarinë e tij përpara muajit korrik 1991.

79. Neni 7/a pika 1 shkronja "d" i ligjit nr. 8577/2000 përcakton si kusht kandidimi që kandidati "të mos jetë larguar nga detyra për shkaqe disiplinore dhe të mos ketë masë disiplinore në fuqi." Nga dokumentacioni i shqyrtuar në dosjen e kandidimit dhe përgjigjet e Universitetit "Luigj Gurakuqi" Shkodër, Këshillit të Lartë të Prokurorisë dhe të Inspektoriatit të Lartë të Drejtësisë, siç tregohen në pikën 43 më sipër, Këshilli konstaton se kandidati Sandër Beci nuk rezulton të jetë larguar nga detyra për shkaqe disiplinore. Po kështu, nuk rezulton që kandidati të ketë masa disiplinore në fuqi. Për rrjedhojë, kandidati Sandër Beci nuk gjendet në kushtet e ndalimit sipas kësaj dispozite.

80. Këshilli, bazuar në të dhënat dhe aktet e administruara në dosjen e kandidimit dhe pas shqyrtimit të informacionit të dërguar nga institucionet dhe agjencitë ligjzbatuese lidhur me procesin e verifikimit të të dhënave të dekriminalizimit, pastërtisë së figurës dhe integritetit, arrin në përfundimin se nga kontrolli i kryer nuk rezulton që kandidati Sandër Beci të gjendet në kushtet që mund të sjellin ndalimin e kandidimit.

*vi. Verifikimi i pasurisë:*

81. Përsa i përket procedurës së verifikimit të pasurisë, në përfundim të veprimeve të kontrollit të ushtruar, në zbatim të nenit 235 të ligjit nr. 115/2016, të ligjit nr. 9049/2003 dhe ligjit nr. 9367/2005, ILDKPKI me shkresën nr. 3211/4 prot., datë 03.09.2021, ka dërguar pranë Këshillit të Emërimeve në Drejtësi, Aktin Përfundimtar nr. 564/23, datë 08.09.2021 dhe rezultatet e kontrollit të ushtruar për kandidatin Sandër Beci dhe personat e lidhur me të. Në përfundim të analizës së hollësishme financiare, të kryer mbi bazën e gjetjeve të siguruara nga informacionet e dërguara nga institucione publike dhe subjekte private, lidhur me deklarimin e pasurisë dhe interesave private të kandidatit Sandër Beci, ILDKPKI në raportin e paraqitur konkludon se:

- a) Deklarimi është i saktë në përputhje me ligjin.*
- b) Ka burime financiare të ligjshme për të justifikuar pasurinë.*
- c) Nuk ka kryer fshehje të pasurisë.*
- ç) Nuk ka kryer deklarim të rremë.*
- d) Nuk gjendet në situatën e konfliktit të interesave.*

82. KED verifikoi përputhshmërinë e të dhënave të deklaruara nga kandidati Sandër Beci në deklaratën e depozituar pranë ILDKPKI, mbi bazën e të cilave ky institucion ka realizuar analizën financiare, në raport me të dhënat që rezultojnë nga informacionet e dërguara pranë tij nga institucionet publike dhe subjektet private të treguara në pikën 47 më sipër. Nga përgjigjet e administruara rezulton se nuk ka informacione shtesë për pasuritë dhe interesat private dhe ato përputhen me ato të ILDKPKI-së. Gjithashtu, Këshilli vlerësoi se nga ana e ILDKPKI është ezauruar në mënyrë shteruese verifikimi i pasurisë së kandidatit Sandër Beci dhe ka rezultuar pa probleme.

83. Për këto arsye, Këshilli vjen në përfundimin se kandidati Sandër Beci ka "kaluar me sukses procesin e kontrollit dhe verifikimit të pasurisë së tij personale dhe të familjarëve të tij". Për rrjedhojë, në zbatim të nenit 235 të ligjit nr. 115/2016 ky kandidat nuk gjendet në kushtet e ndalimit të kandidimit edhe përsa i përket verifikimit të pasurisë.

84. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacioni që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset lejimi i kandidimit të kandidatit Sandër Beci, në vendin vakant për gjyqtar në Gjykatën Kushtetuese të shpallur nga Gjykata e Lartë në datën 22.11.2018, 19.04.2019 dhe rishpallur në datë 03.06.2021.

#### **PËR KËTO ARSYE:**

Në mbështetje të pikës 1 të nenit 149/d të Kushtetutës, të pikës 3 të nenit 229, pikës 4 të nenit 235, pikës 5 të nenit 236, pikës 3 të nenit 237 të Ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “a” të pikës 50 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi,

#### **VENDOSI:**

1. Lejimin e kandidimit të kandidatit Sandër Beci në vendin vakant për gjyqtar në Gjykatën Kushtetuese, shpallur nga Gjykata e Lartë në datën 22.11.2018, 19.04.2019 dhe rishpallur në datë 03.06.2021.
2. Në zbatim të nenit 238 të ligjit nr. 115/2016, ky vendim i njoftohet kandidatit Sandër Beci.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

**ANËTARE**

  
Elsa TOSKA

**ANËTAR**

  
Adnan XHOLI

**ANËTAR**

  
Gjon FUSHA

**Zv/KRYETARE**

  
Marsida XHA FERLLARI

**ANËTAR**

  
Astrit KALAJA

**ANËTAR**

  
Genti XHOLI

**KRYETAR**

  
Ervin PUPË

**ANËTARE**

  
Elona TORO

**ANËTARE**

  
Rilinda SELIMI